

# INUIT ATAQATIGIIT

## Inatsisartuni



12. juli 2019

UKA2019/135

Inatsisartut suleriaasiat § 33 immikkoortoq 1 naapertorlugu matumuuna Inatsisartunut aalajangiiffigisassatut siunnersuut imaattoq saqqummiuppara:

**Qamutit motorillit akileraarutaat pillugit Inatsisartut inatsisaata<sup>1</sup> allanngortinnissaa, imaalillugu ATV-it taakkunungalu assingusut qamutit motorillit nunakkoortit mikinerit sisamanik amerlanernilluunniit assakaasullit ukiumut akileraarutaat 2.000 kronemut appartinnissaanik Naalackersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut Ilaasortaq Stine Egede, Inuit Ataqatigiit)

### **Tunngavilersuut:**

Nunatsinni ATV-t<sup>2</sup> tulluuartuummata akileraarutit aamma naapertuunnerusumik tulluarsarnissaat pisariaqalerpoq.

Kalaallit Nunaanni, ilaatigut kujataani uumasuuteqarfinni/nunaateqarfinni, taamaalillunilu nunaqarfippassuarni ATV-it amerlialuttuinnartut atugaalernikuupput.

Ajornartorsiulli uaniippoq aqqusinermi angallannermi akileraarut ukiup affaanut 3.277 kroneqartoq. Amerlasuut akilerumangisaat ingasagalugu, taamaalillutik pitsaanerutikkaat akileraarummik akiliinngikkunik.

Ukiup affaanut akileraarut 1.000 kronemiippat qamutit motorillit angissusaannut oqimaassusaannullu tulluunnerussagalarpoq.<sup>3</sup>

ATV-inik piginnittut arlallit ullumikkut ukiami nummerpladetik piiartarpaat, upernaraangallu imaluunniit aasaraangat nummerpladelersoqqittarlugit. Taamaaliortarput ukiup affaanut akileraarut, ullumikkut sillimmasiineq

<sup>1</sup> Qamutit motorillit akileraarutaat pillugit Inatsisartut inatsisissaat nr. 3, 16. juni 1987-imeersoq kingusinnerusukkut allannguuteqartumi

<sup>2</sup> Siunnersuutip tunngavilersuutaani atermik "ATV"-imik atuneq ATV-inut taamatullu taakkunungalu assingusut qamutit motorillit nunakkoortit mikinerit sisamanik amerlanernilluunniit assakaasulinnut atornerpoq.

<sup>3</sup> Ullumikkut ATV-it qamutit motorillit akileraarutaannik motorilinnik angallatit 1 tonsip tungaanut oqimaassusillit akileraarutaannik akileraaruteqartinneqarput.

ilanngullugu aningaasartuutaangaatsiartoq amerlasuut akissaqarfiginiarlugu ajornartorsiutigisinnaasaat, sipaarumallugu.

Nummerpladet piiarneqartut atoqqinneqarneq ajorput. Sequtserneqartarput iginneqarlutillu. Akileraartarnermut Aqutsisoqarfimmi allaffissornikkut systemit nummerpladet atoqqinneqarsinnaanerannut aaqqissugaanngillat.

ATV-inik nalunaarsuiuarnerit atuukkunnaarsitsinerillu pisortanut pisariaqanngitsumik artukkiiginanngillat, tassalu politiit akileraaruserivillu, kisianni aamma pinngortitamut pisariaqanngitsumik artukkiinermik kinguneqarput.

Qamutanut motorilinnut ukiup affaanut akileraarut 1.000 kronenngorpat, naatsorsuutigineqarpoq ATV-inik pigisallit ukioq kaajallallugu nummerpladetik pigiinnartalissagaat.

### **Aningaasatigut allaffissornikkullu pisortanut kingunerisassai:**

Allaffissornikkut isumalluutit inatsisissatut siunnersuusiornermi atorineqartussat ukiup affaanik naammassineqarsinnaasoq qaangernaviannngikkaa naatsorsuutigineqarpoq, tassani ilaapput nutserinerit, tusarniaanerit aammalu inatsisissap teknikkitaanik misissuinerit.

Naalakkersuisut §37 naapertorlugu apeqqummut nr.185/2017 akissutaanni qamutit motorillit nunakkoortit mikinerit 332-iusut nalunaarutigaat. Taakkunannga 42-t kommunenit, qulingiluat Namminersorlutik Oqartussanit 59-issillu savaatilinnit atorineqarlutik.

Akiitsuut ukiumut kr. 6.554-imiit ukiumut kr. 2.000-imut allannngortinneqarpat, akileraarummik allannguineq nunatta karsianut 1,5 mio. kr. missaanik akileraarutinit isertitsinikinnerunermik kinguneqassaaq.

Taamaakkaluartorli isertitsinikinnerunissap annikinnerunissaa ilimagineqarpoq, ATV-iutillit arlallit qamutit motorillit akileraarutaannik aasakkuinnaq akiliisarnerat, qamutit motorillillu savaatilinnit narsaateqarnerminni inuussutissarsiutigalugu pigisaminnik illoqarfiup nunaqarfiullu avataani atugaasa qamutit motorillit akileraartussaataannnginnerat atuutereermat.<sup>4</sup>

Kommunet tamakkerlutik 42-nik qamutit motorillit nunakkoortinik mikinernik pillit, ukiumut 191.000 kronenik sipaaruteqarnissaannik kinguneqassaaq.

---

<sup>4</sup> Tak. § 1, imm. 2, nr. 4, Qamutit motorillit akileraarutaat pillugit Inatsisartut inatsisaanniittooq

Siunnersuut ATV-inik pigisallit amerlanerusut ukioq kaajallallugu nummerpladeqartalernissaannik kinguneqarnissaa naatsorsuutigineqarmat, siunnersuut aallaavigalugu politiini aammalu akileraaruserivimmilu allaffissornikkut, tassalu ATV-inik nalunaarsuinerit atuukkunnaarsitsinerillu ikinnerulernissaat aallaavigalugu, annikitsumik oqilisaassisoqarnissaa naatsorsuutigineqarpoq.

**Aningaasaqarnikkut allaffissornikkullu inuussutissarsiortunut namminersortunut kingunissai**

Siunnersuut inuussutissarsiutigalugu ATV-nik atuisumut ataatsimut ukiumut kr. 4.554 aningaasartuutikinnerulernermik kinguneqassaaq. Anguniagaavorlu aningaasartuutaannginnerusut angeqqataannik inuussutissarsiutigalugu ingerlatsinermik inerisaanermut atorneqarumaartut.

**Aningaasaqarnikkut allaffisornikkullu innuttaasunut kingunissai**

ATV-inik pigisallit amerlanerusut ukioq kaajallallugu nummerpladeqarnissaminnut akissaqalissapput. ATV-inik pigisalinnut ukioq kaajallallugu nummerpladeqartareersunut ukiumut qamutit motorillit akileraarutaannut sipaagassaat 4.554 kronemik annertussuseqarpoq.